

Na osnovu čl. 4.2., 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 16. Pravilnika o licencama – Prečišćeni tekst ("Službeni glasnik BiH", broj 63/16), rješavajući po zahtjevu "Elektroprijenos Bosne i Hercegovine" a.d., Banja Luka, broj 06-8968-12/2022 od 6. jula 2022. godine, dopunjen aktom broj 06-8968-15/2022 od 26. augusta 2022. godine, na sjednici Državne regulatorne komisije za električnu energiju, održanoj 13. decembra 2022. godine, donijeta je

ODLUKA

O IZDAVANJU LICENCE ZA DJELATNOST PRIJENOSA ELEKTRIČNE ENERGIJE

1. "Elektroprijenos Bosne i Hercegovine" a.d., Banja Luka, izdaje se licenca za obavljanje djelatnosti prijenosa električne energije.
2. Licenca iz tačke 1. ove Odluke izdaje se za period od 1. februara 2023. godine do 31. januara 2033. godine i koristi se u skladu sa Uvjetima za korištenje licence za obavljanje djelatnosti prijenosa električne energije.
3. Licenca i Uvjeti za korištenje licence za obavljanje djelatnosti prijenosa električne energije sastavni su dijelovi ove Odluke.
4. Vlasnik licence je u obavezi plaćati regulatornu naknadu u periodu važenja licence, na način i u rokovima utvrđenim posebnim aktom.
5. Ova Odluka stupa na snagu danom donošenja, a njen dispozitiv bit će objavljen u "Službenom glasniku BiH", službenim glasilima entiteta i Brčko Distrikta Bosne i Hercegovine.

Obrazloženje

"Elektroprijenos Bosne i Hercegovine" a.d., Banja Luka (u daljnjem tekstu: podnosilac zahtjeva), formiran je u skladu sa Zakonom o osnivanju Kompanije za prijenos električne energije u Bosni i Hercegovini ("Službeni glasnik BiH", br. 35/04, 76/09 i 20/14) i njegova djelatnost je prijenos električne energije i sve djelatnosti u vezi s prijenosom električne energije, koje uključuju, ali se ne ograničavaju na prijenos električne energije, održavanje, izgradnju i proširenje elektroprijenosne mreže u Bosni i Hercegovini.

Podnosilac zahtjeva je vlasnik licence za obavljanje djelatnosti prijenosa električne energije, upisane u Registar licenci kod Državne regulatorne komisije za električnu energiju (DERK) pod registracijskim brojem 05-28-12-341-20/12 od 17. januara 2013. godine, čije trajanje istječe 31. januara 2023. godine.

Shodno pravu da koristi mogućnost obnove licence i ispunjavajući obavezu iz člana 48. Pravilnika o licencama – Prečišćeni tekst ("Službeni glasnik BiH", broj 63/16) da prije isteka važnosti posjedujuće licence, izrazi svoju namjeru da djelatnost prijenosa električne energije nastavi i dalje obavljati, vlasnik licence je podnio zahtjev za izdavanje nove licence koji je zaprimljen pod brojem 05-28-12-191-1/22 od 8. jula 2022. godine. O podnijetom zahtjevu odlučuje se u skladu s pravilima i propisima DERK-a i shodno članu 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11).

Zahtjev je podniet na propisanim obrascima, s dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnijeti uz zahtjev ili predočeni naknadno na traženje DERK-a, omogućili DERK-u da razumije, razmatra i odlučuje o podnijetom zahtjevu o čemu je DERK obavijestio podnosioca zahtjeva svojim aktom broj: 05-28-12-191-5/22 od 15. septembra 2022. godine.

Po pregledu i provjeri svih formalnih elemenata zahtjeva DERK je najprije 20. septembra 2022. godine objavio u dnevnim novinama i na svojoj internet stranici kratku obavijest za javnost sumirajući zahtjev za licencu i odredio rok do 28. septembra 2022. godine za dostavljanje komentara javnosti na podnijeti zahtjev za izdavanje licence.

DERK konstatira da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja djelatnost prijenosa električne energije jer su njegove tehničke, pravne i finansijske mogućnosti permanentno potvrđivane svih prethodnih godina korištenja licence u toku kojih je o tome pružao valjane dokaze.

Nadzor svih aspekata usklađenosti dosadašnjeg djelovanja podnosioca zahtjeva s uvjetima i kriterijima za obavljanje djelatnosti prijenosa električne energije dao je osnova DERK-u da pristupi obnovi licence, odnosno pripremi početne verzije Uvjeta za korištenje licence koja bi važila narednih deset godina. Ovaj dokument je od 3. novembra 2022. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi obavljenoj 9. novembra 2022. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako podnosilac zahtjeva ni u posljednjoj prilici, po podnesku DERK-a broj 05-28-12-191-17/22 od 11. novembra 2022. godine, nije isticao neslaganje s bilo kojom odredbom Prijedloga odluke, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne enegije u BiH i podzakonskim propisima koji reguliraju predmetnu materiju.

Pošto je pregledom statusa primjene svih komponenti koje su odlučujuće za dodjelu licence dobio uvjerljive pokazatelje da podnosilac zahtjeva ima osigurane resurse, organizirane uvjete i utvrđene profesionalne standarde da nastavi obavljati istu djelatnost, DERK je odlučio kao u dispozitivu ove Odluke.

U skladu s članom 9.2. Zakona o prijenosu, regulatoru i operateru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-191-20/22
13. decembra 2022. godine
Tuzla

Predsjedavajući Komisije
Suad Zeljković